

2 december 1998 lo keda graba como un fecha historico..

E ANOCHI MAS CU NUNCA CU ARUBA Y CORSOW A UNI CULTURALMENTE..

Fotos/texto:Poets

DEN AMBIENTE

** Sin duda algun e fecha di 2 di december 1998, cual tabata diaranson ultimo, lo keda un fecha graba den mente di hopi como e fecha historico cu e dos hermana islanan, Aruba y Corsow tabata uni mas cu nunca den e mundo cultural.

E anochi di 2 december tabata realmente un anochi di DOS ruman Aruba y Corsow, aki na Aruba den Cas di Cultura tabatin e "Two Man Show" di Vale Croes (Aruba) y Pachi Damon (Corsow), mientras na Corsow na e mesun momento den Holiday Beach tabatin e "Anochi di Oro" di Dhaddy Brokke (Aruba) y Tony Sherman (Corsow).

Pa e anochi aki tabata aun

mas special, e unico dos radio emisoranan cu a transmiti esaki, Top 95 fm y Radio Corsow fm a realiza esaki como dos ruman, mientras pa corona e anochi aki como esun mas historico, e transmision di television a ser transmiti pa Tele Curacao encadena cu CSS canal 24.

E anochi aki sin duda a refleha e union y paz entre e dos islanan ruman y ta spera cu e union aki lo keda fuerte pa eternidad, pasobra con cu bay bin, e produccionnan di nos dushi idioma papiamento ta keda circula solamente entre e tres islanan ruman Aruba, Corsow y Bonaire.



** Radio Corsow fm y Top 95 manera ruman a transmiti e "Anochi di Oro" for di Holiday Beach na Corsow. Aki por aprecia na momento cu Rino Kuiperi di e programa "Show Time", ta ser entrevista pa Jasmin Pinedo y Jimeno Willem di Radio Corsow fm, mientras DEN AMBIENTE a representa Top 95 fm..



** Dhaddy y Tony den duo na Corsow durante e "Anochi di Oro"..



** Vale y Pachi den nan "Two Man Show" den Cas di Cultura..

GUILFRED BESARIL GANADOR FESTIVAL "COFEPA"..

** GUILFRED BESARIL a resulta e ganador absoluto di e prome festival COFEPA entre empleadonan publico di Aruba y Corsow, cual a tuma lugar

diabierna anochi siman pasa den City One.

E festival tabata di un nivel hopi halto, e caliber di e cantantenan tabata di

kita sombre. Esnan presente a biba cu cada cantante y tabata bon entretene pa e Mc Percy Jeand'or cu a hasi un bon trabao.

E elenco di huradonan tabata forma pa tres di Aruba y tres di Corsow, kendenan tabatin un tarea hopi dificil pa finalmente saca como ganadornan e siguiente cantantenan: Cantante mas popular a bay pa Corsow, Osdelly de Windt cu su cancion "El Espeje", 4e) Corsow - Carlyn Goijla cu "Imagine", 3e) Aruba - Jeanette Richardson cu "How do i live without you", 2e) Aruba - Francis Jacobs cu "Tu Alma Golondrina", 1) Aruba - Danilo Vrolijk cu "Si Tu Supieras" y ganador absoluto Guilfred Besaril cu e cancion "Me Va Extrañar".

Comishon ta informa cu e festival a ser graba pa Tele Aruba, pa cual mester keda pendiente pa e dia cu e lo ser pasa, cual ta algo cu ningun hende por perde. Alaves ta hasi uso di e oportunidad aki pa gradicir e sponsornan y personanan cu di un manera of otro a contribui pa cu e festival aki tabata un exito. PABIEN UN BIAHA MAS NA TUR E GANADORNAN..



** Guilfred Besaril cu su trofeo ganador di e prome festival COFEPA..